

Centro di Investigacion y Desaroyo ta amplia cu indentidad nobo

Universidad di Aruba ta habri caminda pa un scol di PhD pa contribui na eleva capacidad na Aruba

Interes ta keda grandi bou academiconan local pa drenta den un trayectoria di PhD

ORANJESTAD —

Universidad di Aruba tin su propio 'PhD Research School,' danki na un interes grandi di parti di academiconan local pa sigui un trayectoria di PhD. Sinembargo, e identidad nobo tambe ta resultado di e confianza y conviccion, pa no papia mes di compromiso di parti di Profesor Dr. Cees Hamelink.

Recientemente Rector Adhunto di Universidad di Aruba, Dr. Ryan Peterson hunto cu Profesor Hamelink, kende ta docente di Comunicacion Internacional na Universidad di Amsterdam y docente di Media, Religion y Cultura na Vrije Universiteit, y 'Hoogleraar' di Universidad di Aruba a amplia riba e identidad nobo aki di Universidad di Aruba. Profesor Cees Hamelink ta un experto internacionalmente reconoci riba tereno di comunicacion y derechonan humano, cu durante su carera a duna cursonan na no menos cu 45 universidad. E tabata consehero principal pa Nacionnan Uni riba tereno di comunicacion y ta encabeza e Liga di Derechonan Humano na Hulanda.

Segun Rector Adhunto, Dr. Ryan Peterson, e 'PhD Research School,' ta cuadra den e filosofia di Universidad di Aruba cu na 2007 a habri su Centro pa Investigacion y Desaroyo. E centro aki ta dirigi pa stimula investigacion cientifico riba diferente tereno na Aruba. Pero no tur e investigacion ta na nivel PhD. Asina tin un investigacion grandi riba salud a tuma luga bou auspicio di Universidad di Aruba. Como parti di e centro di investigacion aki, conhuntamente cu Profesor Hamelink, Universidad di Aruba ta ofrece un trayectoria di estudio academico for di nivel Bachelors y Masters te na e nivel di PhD.



Rector Adhunto di Universidad di Aruba, Dr. Ryan Peterson hunto cu Profesor Hamelink, kende ta docente di Comunicacion Internacional na Universidad di Amsterdam y docente di Media, Religion y Cultura na Vrije Universiteit, y 'Hoogleraar' di Universidad di Aruba.

Manera Bon Dia Aruba a bin ta ilustra for di aña pasa caba, un total di 12 academico, 11 local y un di Jamaica, a compromete nan mes pa sigui nan estudio na nivel PhD. Ya e grupo aki tin practicamente un aña trahando riba nan investigacion, invertiendo hopi tempo y esfuerzo.

INFORMACION PA GRUPO NOBO DIARANZON AWOR

Awor Universidad di Aruba ta habriendo porta pa un di dos grupo di academico local cu kier sigui e trayectoria di PhD, cu ya caba ta conta cu 8 docente di Universidad di Aruba mes inscribi pa sigui e programa. Diaranzon awor, dia 28 di Januari, Universidad di Aruba lo tene un mainta informativo, entre 10'or y 12'or pa tur esnan cu un titulo doctoral (drs.) of Masters, pa haya detayenan di kico tur ta ensera un estudio na nivel PhD, e esfuerzonan cu esaki ta exige y otro rekesitonan, entre otro e beneficianan cu Universidad di Aruba ta brinda, Dr. Peterson a splica. Durante e mainta aki, Profesor Hamelink lo splica tambe e proceduranan y e

papel cu e 'promotor,' lo tin. E promotor ta un profesor di un of mas Universidad na Hulanda cu ta dispuesto pa guia e participantenan na e programa, esta e asina yama 'promovendi,' den e proceso pa nan haci un investigacion na nivel PhD, te pa skirbi y defende nan proefschrift.

PHD RESEARCH SCHOOL

E PhD Research School mes lo keda proclama Februari 3. E modelo cu ta sigui ta un colaboracion intenso cu un Universidad Hulandes of di exterior unda e promovendi lo mester defende su proefschrift. Universidad di Aruba lo percura paralelamente pa un pograma cu ta consisti di seminarionan na nivel PhD y encuentronan durante cua e grupo di candidatonan di PhD ta bini hunto pa presenta nan investigacionnan periodicamente. E meta di encuentronan asina ta pa fomenta un discusion critico riba e trabou di cada candidato, pa e di forma aki cada un haya un idea di e relevancia di nan investigacion y conclusionnan te e momento ey. E seminarionan cu

Universidad di Aruba ta ofrece ta trata temanan di desaroyo, filosofia, ciencia di conocimiento, metodologia di investigacion, entre otro, unda no ta perde e context propio for di bista. Manera cualkier estudiante, e candidato mester paga 1080 florin pa atende lesnan, pero e costo grandi mes ta e sacrificio personal grandi cu e estudio aki ta exige. "Pero e ta bale la pena," Dr. Peterson a bisa.

SYNERGIA CU CENTRO PA INVESTIGACION Y DESAROYO

Den otro palabra, cu excepcion di e defensa di e proefschrift, tur e trayectoria ta tuma luga na Universidad di Aruba mes. Pa tal motibo mes, e candidatonan mester inscribi nan mes formalmente na e instituto academico local, y asina haya e sosten pa nan investigacion y tin acceso na facilidnan di e Centro pa Investigacion y Desaroyo, bou cua e PhD Research School lo cay.

Segun Dr. Ryan Peterson, tin un synergia den e Centro di Investigacion y Desaroyo, no solamente cu e 'PhD Research School' pero

tambe cu e investigacionnan cu e diferente facultadnan di Universidad di Aruba a y ta ehecuta den diferente area. "Idealmente lo tin investigacion riba e impacto social di turismo riba un isla di economia chikito. Esey lo ta un candidato di PhD cu ta trahando hunto cu e facultad di turismo, pero cu tambe ta den e Centro di Investigacion y Desaroyo."

Profesor Hamelink a splica tambe cu tin un grupo grandi di profesornan na Hulanda disponibel y dispuesto pa guia candidatonan durante nan trayectoria di PhD, specialmente pa motibo cu e ta un enrikesimento scientifico y tambe e ta nifica un contribucion na nan propio institucion, mirando cu Gobierno Hulandes ta aloca sumanan specifico pa cada promocion cu tuma luga bou nan auspicio.

Durante e anochi di proclamacion, dos candidato cu actualmente ta den e trayectoria di PhD lo duna un imagen di e identidad nobo, a base di nan experiencia di ultimo aña.

CONTRIBUCION NA INTELECTUALISACION DI ARUBA

E PhD Research School ta forma parti di e programa 'Post Graduate Capacity Building of Aruba,' cu ta dirigi na un maneho y liderazgo na nivel academico y tambe na docentenan hopi cualifica pa e diferente programanan di Universidad di Aruba.

"Cu e inicio oficial di e PhD Research School, Universidad di Aruba ta spera di duna un contribucion mas grandi ainda na promocion di expertisio, pa asina Aruba por ta cla pa retonan grandi cu nos tin como pais y asina amplia e control riba nos propio desaroyo," Rector di Universidad Dr. Lydia Emerencia a bisa.